

Ruka podrške za otvaranje novih radnih mjesta i podizanje životnog standarda



Broj izgubljenih radnih mjesta i pad životnog standarda do čega je došlo u 2009. godini predstavljaju najozbiljniji i najhitniji izazov sa kojim se suočava Bosna i Hercegovina, izjavio je danas visoki predstavnik i specijalni predstavnik EU Valentin Inzko.

Sa ovom krizom se "mora suočiti smjelim srcem", rekao je visoki predstavnik i specijalni predstavnik EU, "a do sada, barem među odgovornim liderima, tog smjelog srca nije bilo."

Visoki predstavnik i specijalni predstavnik EU govorio je na prezentaciji *Bijele knjige* koja predstavlja prijedlog Vijeća stranih investitora, a osmišljena je kako bi unaprijedila poslovno okruženje BiH.

"*Bijela knjiga* ne samo da utvrđuje prepreke koje onemogućavaju okončanje siromaštva i podizanje životnog standarda", rekao je visoki predstavnik i specijalni predstavnik EU. "Ovaj dokument preporučuje korake koji se mogu poduzeti da se eliminiraju ove prepreke."

On je pozvao medije u BiH da objave preporuke iz *Bijele knjige* "isto tako detaljno i dramatično kao i kad izvještavaju o političkim i ustavnim prijedlozima."

Visoki predstavnik i specijalni predstavnik EU pozvao je političke lidere i parlamentarce u BiH da implementiraju «detaljan plan za prosperitet» koji je već usaglašen. On je

rekao da Evropsko partnerstvo i proces stabilizacije i pridruživanja «utvrđuju, korak po korak, put ka većem broju radnih mesta i višem životnom standardu», te da «politički establišment u BiH treba pomoći da krene tim putem.»

«Ključne reforme kasne – bez ikakvog dobrog razloga – i to godinama», rekao je on, ponovno pozivajući na donošenje Zakona o obligacionim odnosima, modernizaciju sistema bankarske supervizije i uspostavljanje Socijalno-ekonomskog vijeća.

«Ovo su neki od ključnih koraka za konsolidaciju jedinstvenog tržišta koja se zahtjeva prema Ustavu BiH i procesu evropskih integracija.» rekao je on. «Nepoduzimanje ovih koraka u 2009. godini direktno je doprinijelo teškoćama koje sada pogađaju stotine hiljada porodica u BiH.»

Konstatirajući da su «oni koji su investirali u Bosnu i Hercegovinu dio šire zajednice ljudi koji ovoj zemlji žele dobro, ljudi koji vjeruju u budućnost ove zemlje, ljudi koji znaju da ona može uspjeti, da se može razviti – i to brzo – u prosperitetnu demokratsku državu koja je sposobna da zauzme svoje mjesto u Evropskoj uniji», visoki predstavnik i specijalni predstavnik EU je izjavio da «mnogi politički lideri u BiH nisu bili u stanju da razviju isto to povjerenje u ljude i izglede ove zemlje».

On je rekao da «ovim političarima treba ruka podrške» i da međunarodna zajednica nastoji da pruži ovu ruku podrške.

«Investitori imaju pravo da govore i pravo da ih se čuje. Oni su to pravo zaradili demonstriranjem vjere u Bosnu i Hercegovinu, investiranjem miliona i otvaranjem novih radnih mesta.» – rekao je on, dodavši da prijedlozi iz Bijele knjige predstavljaju ruku podrške «koja može pomoći da se okončaju nezaposlenost i siromaštvo u ovoj zemlji».

Puni tekst obraćanja visokog predstavnika/specijalnog predstavnika EU se može naći na web stranicama www.ohr.int i www.eusrbih.eu